

5. ՍՄԲԱՏՆ ՈՒ ՍՀԱԿ

Շատ աղքատ մարդու մեկին էրկու հատ տղա է էղնում: Մեծի անունը Սմբատ է էղնում, պզտիկին՝ Սհակ:

էդ աղքատ մարդն ու կնիկը մեռնում են: Մնում են տղերք եթում, մեծը տաս տարեկան, պզտիկը՝ օխտը:

Հերն ու մերը որ մեռնում են Սմբատը ըսում է.— Նա ախպորս պտի տանիմ էն մոտիկ գեղի տերտերի մոտ տամ կարդու: Ու տանում էդ տերտերին տալում է:

Տերտերը խոսում է Սմբատի հետ որ.— Ինչունի հինգ տարի, տարին իրեք մանեթ հախ կառնիմ ու կը սովրեցնեմ:

Սմբատն էլ ղարուլ է անում, ու հինքն էլ գալում իրանց գեղին էղնում է նոքար:

էդ աստվածասեր տերտերը ինչունի հինգ տարի Սհակից իրեք մանեթ հախ է առնում, իր հացով ջրով պահում է, կարդալ գրել լավ սովրեցնում է: Հինգ տարուց հետև արդեն ինքը համ Սհակին կարդցնում է, համ էլ հախ է տալում: Սհակն էլ շատ ժիր ու խելացի տղա է էղնում, էդ տերտերի տուն էդոր իրանց ավլտի պես հազ էն անում:

Տերտերին մե սիրուն աղջիկ էլ է էղնում, էդ աղջիկն էլ Սհակի հետ կարդում է տերտերի մոտ:

Սհակն ու էդ տերտերի աղջիկ սրտով հիրարու հետ քուր ու ախպեր են էղնում:

Սհակը մնում է տերտերի տուն ինչունի տասը տարի: Հինգ տարվանից հետև տերտեր Սհակին համ կարդցնում է, համ էլ հախ է տալում: Ինչունի տաս տարի թմմելը Սհակի հախ տերտերի վրեն էղնում է հարուր հիսուն մանեթ: Սմբատն էլ տասը տարի իրանց գեղին էղնում է նոքար, աշխատում է երկուհարուր մանեթ: Հ'ելնում էրթում է, որ տերտերի տնեն ախպորը բերե: Էրթում հասնում է տերտերի տուն, հ'իրկուն տերտերին ըսում է.

— Տերտեր ջան, էկե՛լ եմ Սհակին տանիմ, բոլ է, ինչքան որ մնաց, ջնորհակալ եմ տերտեր ջան:

Սարախտան հ'ելնում են որ գան, տերտեր բերում 150 մանեթ տալում է Սմբատին ու ըսում է.— էս էլ Սհակի հինգ տարվա հախն է: Ինչունի հինգ տարի առանց հախ էր, հինգ տարուց հետո հախով է ու էս 150 մանեթն էլ էնոր աշխատանքն է էղած:

Հ'ելնում են էրկու ախպեր տերտերի աջն համբուրում, մնաս բարով են ասում ու գալում են իրանց գեղ:

Գալում են տուն իրանց հմար կով են առնում, եզներ են առնում ու բաշլալում են ռանչարութուն անել: Սմբատը կարգվում է, մի աղջիկ է առնում գեղի միջեն, մի երկու տարի անցնում երեխաներ է էղնում:

Սհակն էլ արթըխ լավ դալի դանլի է դառնում, կարգվելու վախտն է էղնում: Սմբատ աջում է, որ իր տան գործն էլ մեկ օղլուշաղով չի քելում, ռանչարութունը դժար է, մտածում է Սհակին էլ նիջանել: Սմբատ հ'ելնում էրթում է մոտիկ գեղը, էրթում է իրան բարեկամի տուն, հարց ու փորձ է անում թե.— Ս եր տան, իմ ախպորս լայեղ աղջիկ կա՞ ձեր գեղին, որ հ'ուզենք:

Բարեկամն ըսում է թե.— Վալլահ, մեր գեղին էնենց լավ աղջիկ չկանե, հմա մի լավ աղջկա տեղ քեզի կըսեմ, դու դիտես էդ մարդուն: Էսինչ գեղի տերտերին մի լավ աղջիկ կա, որ ախպերդ էնոր մոտ կարդում էր:

Հ'ելնում Սմբատ էրթում է տերտերի տուն, որ տերտերի աղջիկը հ'ուզե Սհակին: Սհակը հեշ բանե խաբար չէ: Զաթի գեղացիքն էլ էնենց դայդա չունին որ տղին, յա աղջկան հարցնեն թե. «Հ'ո՞ւմ ես առնում»:

Հ'իրկուն Սմբատը խոսում է տերտերի հետ թե.

— Եկե՛լ եմ ասսու յոլուղ անունով քու աղջիկդ հ'ուզեմ մեր Սհակին:

Տերտեր շատ է ուրախնում, ասում է.— Ես իմ աղջիկս խոմ Սհակից ավելի լավ տղի չպտի տամ:

Աղջկան էլ հարցնող չկա, էն խո ծախու ապրանք է, վե՛ւ էնոր խոսեցնել կուտա՛ւ:

Տվեցին. առան, կերան, խմեցին քեֆ արին: Սմբատ դառավ էկավ տուն, թե.— Վալլահ, գնացի, տերտերի աղջիկ հ'ուզեցի Սհակին:

Սհակ, ըստե, էլ ամոթու չի ասում, թե. «Ես տերտերի աղջրկան չեմ առնում, ընդոր քուր եմ ասել»: Աղջիկն էլ չի ասում, թե. «Ես էդ տղին ախպեր եմ ասեմ: Էդենց, բանը մնում է ինչունի հարսնիքի վախտ: Էրկու թարաֆն էլ հարսնքի թապտիր են տեսնում, որ պսակեն: Ամա սաղ տարին Սհակի նիաթները չի բացվում ու ախպերն էլ ոչինչ չի հասկնում, բազի հարցնում է էլ՝ Սհակը բան չի ասում ամոթուն:

Սմբատը խաբար է տալում տերտերին, թե. «Ֆլան օր հարսնածը դալում է», տերտերն էլ իր ամեն մի թապտիրը տեսնում է: Հարսնածը էրթում հարսը բերում է, տանում պսակում են, մե օր, էրկօր հարսնիք ու քեֆ ու ուրախութուն են անում: Էն հ'իրկուն որ հարսնիքը վերջանում է, Սհակը էրթում մտնում է իր օթախ ու իր մեջ որոշում է. «Ես, էդ աղջկան մեկ հեղ սրտով քուր եմ ասե, հիմի դալում է ըստե, թե որ քուր կը մնա ինչունի օր մահին՝ լավ, թե չի մնա՝ աստուծ իր բան հաջողե, թող էրթա հ'ուր հ'ուզում է»: Էդ մտածունքի մեջն էր, բիրդան հորքուր-մորքուրներ հարսը բերին: Քիչ խոսացին յարանութուն արին ու թողին գնացին:

Սհակ հ'ուզում է փորձել աղջկան, ասում է.— Բարով, հազար բարի էկար մեր տուն, քուրս:

— Աստու բարին ախպեր ջան:

— Միտդ դալո՞ւմ է,— Սհակ կոսե,— որ ձեր տուն կարդացած վախտ քուր ու ախպեր էղանք հ'իրուր հետ: Հիմիկ դաբուլ կոնե՞ս ինչունի մահ քուր ու ախպոր պես հ'իրար հետ ապրինք: Թե դաբուլ անում ես, գլխիս վրա կեցի, թե դաբուլ չես անում, հոգով չես կաբա ինձ հետ դիմանալ, ճամբեն հ'առաջդ է, գնա հորդ տուն: Ես քեզի մի անգամ հոգով քուր եմ ասել, խոսքես չեմ դառնում:

— Չէ', չէ', ամոթ է, հորս տան ճամբեն մի ցցներ, ես որ էրթըլու էղնեի, հորս կոսեի թե, չեմ էրթում: Ես էլ քեզի հոգով ախպեր եմ ասել, ինչունի օրնի մահին էլ կ'մնամ ու քուր ու ախպոր պես կապրիմ:

Էսենցով կեցան, իրանց սրուր օնչովի շատին մի էրկու իրեք տարի: Էրթում աշխատում էին ինչունի հ'իրկուն, հ'իրկուն դալում մտնում էին իրանց օթախ ինչունի լուս, յա մեկ էրկու սհաթ պա-

կաս աղոթք էին անում: Առավոտ հ'ելնում էին քնհարամ, էլ չէին կոնար էնքան էլ շատ լավ աշխատել, քնհարամ մնալուց թուլանում էին: Էլի մի էրկու տարի անցնում է, Սմբատ աշում է, որ էլ Սհակն ու իր կնիկ էնքան էլ չեն աշխատում, ասում է. «Ջար, ախպերս մատղաշ շունի էդոր հմար շի աշխատում: Լավն էն է, որ հ'իրարից բաժնվինք»: Սհակն ու Սմբատ հ'իրարուց բաժնվում են:

Մի քանի տարի էլ էսենց Սհակն ու իր կնիկ բաժան կ'ապրին, ու զօր ու գիշեր աղոթք կոնեն, իրանց բաժին մալն ու փարեն կուտեն կը թեթևցնեն: Օր մի Սհակ հ'ելնում թապտիր է տեսնում, որ էրթա Երուսաղեմ:

Կնկան ասում է.— Ես էրթում եմ Երուսաղեմ, ինչունի քառսուն օր ընձի կըբաբլայես, էկա, էկա, թե որ ինչունի քառսուն օր չէկա՝ հիմացի որ էլ չեմ գար: Նեղ որ մնացի կէրթաս ախպորս մոտ, ախպերս չ'պահեց կ'էրթաս քալորոշ գեղ, մեր քալորոշ մոտ, թե էն էլ չ'պահեց, էն վախտ արի Երուսաղեմ, ընձի գտի:

Սհակը մնաս բարով է անում կնկան ու էրթում է Երուսաղեմ, էլ չգալու նպատակով:

Սհակ էրթում է Երուսաղեմ, օրշնվում էղնում է վարդապետ:

Կնիկ էրկու տարի սաղ բաբլայեց Սհակին, Սհակը չէկավ, ինքն էլ տան էղած չէղած ծախեց կերավ ու շգնաց տեգը Սմբատի մոտ:

Սմբատն էլ աշեց, որ էրկու տարին թմմավ, իր ախպեր գնաց ու չէկավ, օր մի սատանեն մտավ էդ մարդու դալպ, հ'իրկուն հեշավ գնաց ախպոր կնկա տուն: Աշեց, որ Սհակի կնիկ շոքած աղոթք է անում: Նստում խոսում է, խոսքի միշով հասկցնում է հարսին: Հարսը հասկնում է տեգեր միտք, յալվար է անում թե.— Ամոթ է, թող միտքդ, հ'ելի գնա քու գործին:

Աշում է որ իլլաճ չկա, Սմբատի ձեռից շի կաբա ազատվի, ասում է.— Դու քու աստուծ, որ չես համոզվում, յալաշ էրթամ դուսլվացվիմ, ոտներս հ'իստկեմ գանք պառկինք:

Տերտերի աղջիկ հ'ելնում դուա, խափում է տեգեր ու թողնում փախնում է, հայտե քալորոշ գեղ, հ'ուրտի ես էկա:

Էրթում հասնում է գիշեր քալորոշ տուն, դուռը ծեծում: Հ'ելնում բանում են, աշում են որ իրանց սանամեր.— Տա, սանամեր, խեր էղնի, էս մո'նց է էղել, որ էս գիշերով էկել ես:

— Ի՞նչ անեմ քալոր շան, էկել եմ ձեր տուն, որ ընձի պահեք, ձեր տան մեշ, ես էլ ձեր տան խզմաթ բան կոնեմ:

Քալորն ասում է.— Սանամեր շան, մեր գլխի վրա տեղ ունիս, մեր աչքի լուսի պես քեզի կը պահենք:

Սանամեր մի վախտ էլ քավորոշ տանն է մնում, խզմաթ բան է անում: էղոնք էլ էնքան հազ են անում, որ հոգի են տալում սանամոր վրեն:

էգ քավորոշ էրեխա չի էղնում: Մոնց է էղնում աստուծ խեղճ է գալում մի տղա է տալում: Մարդ ու կնիկ էնքան հազ են անում, որ էլ չեմ կարա ասել:

Քավորոշ մի մշակ է էղնում, էգ մշակի աչքն էլ հ'ընկնում է սանամորը, շատ է աշխատում, հ'ետե հ'ընկնում: Մի օր էլ խոսք է քցում, սանամեր անպատվում է: Մշակն ըսում է.— Յավաշ դու, ես էնենց րան անեմ, որ դու էլ փռչմնիս:

Մի գիշեր մշակ աշում է, որ աղեն ու իր կնիկ քնած են: Դանակը սրում էրթում է էգ մեկուճար էրեխեն օրոցքի մեշ մորթում է ու արնոտ դանակ տանում քնած վախտ դնում է սանամոր շեպ ու դալում քնում է:

Քավորը զարթում աշում է, որ տղի ձեն չի հ'ելնում: Կնկան ըսում է.— Ա՛յ կնիկ, մի վեր ել աշե էրեխեն ձեն չի հանում, ամեն օր ախր շատ էր լալում:

Կնիկ հ'ելնում աշում է, որ աղեն մորթած է: Մնկներին տալում ու լալում է, մարդուն ըսում է թե.— Ձեա ըսում տղեն մորթած են:

Հ'ելնում մարդ ու կնիկ լալում են: Ձեն հասնում է սանամեր, հ'ելնում գալում է, որ տղեն մորթած են, շվարում, մնում է, հ'ինքն էլ է լալում: Մշակն էլ է գալում, ըսում է.— էդ ի՞նչ է էղած, յազո՞ւզ եք լալում:

Ըսում են, որ գիշեր տղեն օրոցքի մեշ մորթեր են:

— Վե՛ւ կոնե էս գիշեր հատաղեն, ձեր սանամորեն զայրի:

Ձեն հավատում քավորն ու իր կնիկը մշկին, հերսոտում են:

— Չէ՛,— կոսե,— որ էդենց է, ես սանամոր շեպը պտի աշեմ, ձեր ի՞նչ բանն է:

Մշակը էրթում սանամոր շեպից արնոտ դանակը հանում է.

— Ա՛ն, էս ի՞նչ արնոտ դանակ է, որ ես ասում եմ, թե սանամերն է մորթած, դուք չեք հավատում:

Սանամերն ըսում է.— Որ էդենց է, սուտ ասողը իր պատիճ աստծմեն գտնի, գոթի յարաներ վրեն թափի, լավ օր շտեսնի:

Քավորն ու իր կնիկն էլ հեշ չեն հ'իմանում թե ինչ ասեն, ձեները կռում մտածում են, բազի լալում են:

Սանամեր վերցնում ըսում է.— Մի լաց լինեք իզուր տեղ, պառկեք քնեք, հալթատ աստուծ ողորմած է:

Քավորն ու իր կնիկն էլ շատ որ լալում են, բեզրում, թմրում,

քները տանում քնում են։ Սանամերը բերում էրեսի կռած գլուխը կպցնում է ջանդկին, կապում է օրոցքի մեջն ու էրթում իր հ'օղեն, շոքում լալում ու աղոթք է անում։ Աստուծ լսում է էդ սուրբի աղոթքը, էրեսին էլի հոգի է տալում, սաղնում բաշլայում է օրոցքի մեջ լալ։ էրեսի ձենից օյամիջ է էղնում հերը, ձեն է տալում կնկան.— Կնի'կ, կնի'կ վեր հ'ել տղեն սաղցեր լալում է։

Կնիկն էլ հ'ելնում աչում է, որ ղորդ, տղեն սաղցել է։ Կանչում են սանամոր, ըսում են.— Սանամեր, էս ի'նչ բան էր, էրա'զ էր, ի'նչ էր, ախր մեր էրեսին մորթեր էին, արնոտ դանակ մշակ քու ջիպից հանեց, ախրը, էս մո'նց էղավ, որ հիմի տղեն էլի սաղցավ, կէղնի որ մեր տեսածը էրազ էր։

— Չէ', քավոր ջան, ղորդ էր, շի' հմար էրազ էր։ Ես իմ մեղավոր բերնովս լացի, աղոթեցի ասսուն, աստուծ իմ աղոթքը լսեց, շունքի ես մեղավոր չէի' էդ բանի մեջ, ու էրեսին էլի հոգի տվեց, դուք էլ աղոթք էրեք, ասսուն փառք տվեք։

Քավոր ընտից հ'ետև ավելի պատվով պահեջ սանամոր։

Մշակը էլի վազ չէկավ սանամոր մոտից։ Սանամերը տեսավ, որ ճար շի էղնում, հ'ելնում, մի ար քավորոջ ըսում է.— Քավոր ջան, ընծի ճամբու ծախս տուր, ես պտի էրթամ Երուսաղեմ։

Քավորը էրկու հարուր մանեթ տալում է սանամորը, սանամեր դեմ է անում Երուսաղեմ ու էրթում է։ էրթում է, ջատ ու քիչ աստուծ դիտե, էրթում հասնում է հ'իրիկվա մթան մի գեղի, էրթում գերեզմաների միջով աչում է, որ մի մարդ, մի թազա գերեզման փորեց, մի մեռած մարդ միջեն հանեց։

էրթում, ըսում է.— Ախպեր, ախպեր, էդ ի'նչ ես անում, մեղք չէ, էդ մեռած մարդ յաղո'ւզ ես հանում։

— Ի'նչ անեմ, որ էսոր չ'հանեմ, էս մարդու գլուխը պտի քարերին տամ ջարդեմ, որ սիրտս հովնա։ Ես մի քասիք մարդ եմ. 200 մանեթ էս մարդուն տվի ձեռքը, որ մի ջաթթույ հետև իմ փարեն տար, ինք մեռավ, էս մարդու տնեցիք ուրացան, իմ փողը շտվին ես էլ իմ հերսուն էս մեռլի գլուխը պտի ջարդեմ։

Հանում էդ կնիկ իր մոտի 200 մանեթ տալում է էդ մարդուն, ու ասում է.— Ախպեր, առ քու էրկու հարուր մանեթդ, էդ մարդուն դիր իրան տեղ, էլի հող լից վրեն։

էդ մարդն էլ իրա փողն առնում է, մեռլին հողով ծածկում ու թողնում էրթում է։ Կնիկն էլ իրան ճամբովն է էրթում։ Մեկ էլ աչում է մթան մի մարդ, մի թարաֆ սազ, մի թարաֆ մեռած, էկավ իրան հասավ։

Կնիկը հարցնում է էդ մարդուն.— Ի՞նչ մարդ ես, հո՞ւր ես էրթում:

— Ես էն մեռած մարդն եմ, որ դու իմ տեղ 200 մանեթ փող տվիր, աստու հրամանով ես սաղցա, էկա էդա քեզի հ'ընկեր, դու հո՞ւր ես էրթում:

— Ես էրթում եմ Երուսաղեմ:

— Ես էլ եմ քեզի հ'ընկեր էղնում:

Քիչըմ տեղ որ էրթում են, էդ մեռած մարդը աշում է, որ էդ կնիկը թավաթիր (") սիրուն է, միտքը փոխում է: Կնիկ հասկնում է, թե էդ մարդու միտք գեշ է, ասում է.— Ախպեր, ես քեզի հ'ընկեր չեմ էղնում, յա՛ դու հ'առաջ գնա, ես հետ կը մնամ, յա՛ ես հ'առաջ կէրթամ, դու հետ մնացի:

էդ մարդ հետ է ընկնում, կնիկ էրթում:

Աստուծ էդ մարդուն պատճում է, էլ չի մեռնում: Էնենց կես մեռած, կես սաղ ման է գալում, էրթում է իր տուն, սաղ գեղացիք տեսնում, խնդում ու ծիծաղում են էդ մարդու վրեն:

էդ տերտերի աղջիկ էրթում հասնում է ծովին: Մտնում է գամին, որ անցնի Երուսաղեմ: Գամիճին տեսնում է էդ կնկա անշափ սիրունությունը, մտքի մեշ ըսում է.— Հեյ վա՛խ, էսենց սիրուն օղլուշաղ ի՞նչ դարտ ունի, որ ման է գալում:

էրթում գամուց դուրս է հ'ելնում, իրա հմար վարդապետի ջոր է հագնում ու էրթում է Երուսաղեմ:

Հ'իրկվան գնաց վանքի դուռ կայնավ, ժամը տվին: Աչեց որ թոմար վարդապետներ էկան, գնացին ժամ աղոթք էնելու: Տեսավ, որ իր մարդը՝ Սհակ վարդապետ է դառե, էկավ. վարդապետներու հետ գնաց ժամ: Ինքն էլ մտավ ժամ աղոթք արեց, ժամից պրծան դուս հ'ելան, մեծ վարդապետը, որ թոմրի գլուխն էր, հ'ելավ դռան մոտ կայնավ, մեկել վարդապետներ սրով էկան էդ մարդու աջը համբուրեցին ու անցան:

Թոմրից հետե էկավ էդ կնիկ, վարդապետի աչն առավ ու խընդրեց, որ իրան մե հ'օդա տա, որ ըստից հետե դատմի պտի մնա հոտ: Մեծ վարդապետ տեղ տվեց. մնաց ըդտեղ:

Մի վախտ անցավ: Օր մի, գիշեր էրազի մեշ թոմրի գլխավոր վարդապետը էրազ տեսավ թե՛ ըստից հետե վանքի մեծությունը էդ թագա դալող վարդապետը պտի անե: Վարդապետ գլուխ չի գնում: Մի քանի հեղ էլի էրազ գալում, թե. «Որ չեք լսում, ձեր աչքերը կը հանեմ»:

Վարդապետ հ'ելնում սաքախտան թոմրին կանչում ըսում է.—

Ես էրազ եմ տեսած, ըստից հետև էս թագա գալոզ վարդապետը պտի էղնի թոմրիս մեծ, վանքի վանահայրությունն էս մարդը պտի անն:

Թոմարն էլ համոզվում են: Ընտից հետև ղատիմի վանքի դուռը նոր գալոզ վարդապետը կայնում, թոմար սրով գալում են աջն առնում են, սրեն որ գալում է էդոր մարդուն՝ Սհակ վարդապետին, ի թողնում որ իր աջն առնի, հիրարու հետ էրթում են իրանց տեղերը:

էս կնիկ վարդապետը էնենց է էղնում, որ ո՛ր հիվնդի վրեն որ մի աղոթք է ըսում, հիվանդը սաղնում է: Ըստոր ձենը շուտով ցըրվում է սաղ աշխարք: Ամեն տեղից հիվնդներ են գալում, սաղնում ու էրթում են:

Մենք խաբար տանք հարսի տեքրից, քավորոշ մշկից, էն կես մեռած մարդուց ու գամիճուց:

Սմբատը էնենց որ արեց, աստու հրամանով էնենց գեշ յարա թափավ վրեն, որ էլ մի ասեր: Քավորոշ մշակն էլ, էլի էնպես էղավ: Զ՛ուրտի գնացին ճար ու իլլաճ շէղավ: Ձեն էկավ հասավ էդ մարդկանց թե. «Իշտը Երուսաղեմ էսենց մի սուրբ վարդապետ կա, ինչ հիվանդ որ էրթում է մոտ, սաղնում գալում է»:

Սմբատն հիւնում գալում է քավորոշ գեղ, հարցնում են թե.

— Զ՛ուր ես էրթում:

Ասում է.— էրթում եմ Երուսաղեմ, մի սուրբ վարդապետ կա, էնոր քով:

Քավորոշ մշակ լսում, գալում էդոր հետ հընկեր է էղնում, էրթում են:

Գալում հասնում են մեռած մարդու դեղ, էն էլ է հընկեր դառնում, էրթում են: Իրեքով էրթում մտնում են գամին, աշում են, որ գամիճին լավ, սաղ սալամաթ խոսում է իրանց հետ: Քիշ մնում է, աշում են, որ էդ մարդ խելքը կորուց, խելուավ: Հարցնում է էդ մարդկանց թե.— Զ՛ուր եք էրթում:

Ասում են.— Իշտը Երուսաղեմ մի լավ վարդապետ կա, էրթում ենք էնոր մոտ, բալքի սաղնանք:

Գամիճին ըսում է.— Ես էլ ձեզի հետ գալում եմ էդ վարդապետի մոտ:

Չորսն էլ հիրարու հընկեր են էղնում ու էրթում են:

էրթում հասնում են Երուսաղեմ, թեփ են էղնում վանքի դուռ: Աշում են, ժամի վախտ վարդապետներ էկան, գնացին ժամ: Ժամից հիւան հարցուցին թե՝ էն վարդապետն որն է: Ամա, էնդոնք որ ժա-

մի դուռ թոփ էին էղած, վարդապետ ճանչցավ, օնինչ չ'ասեց, ներս մտավ:

էդ մարդիկ էկան, շորսն էլ իրան քցեցին էդ վարդապետի հոտաց:

Վարդապետ հարցնում է.— Ի՞նչ եք ասում, լավանա՞լ եք հոգում, հօելեք թմար ձեր մեղքերը խոստովանեք: Վարդապետներին էլ թոմրին կայնեցնում է: Հ'առաջ տեղորն է հարցնում.— Դու ի՞նչ մեղք ունիս, ասա՛:

Սմբատ մեղքեր թմար ասում է, էդ մեկը պահում է չի ըսում:

— էլ մեղք չունի՞ս:

— Չէ,— կըսե Սմբատը:

— Չէ, էլի ունիս մեղք, ասա՛, ինչունի մեղքերդ թմար չ'ասես, փրկութուն չ'կա:

Սմբատ մեկ մեկ կոսե.— Իշտա ախպերս գնաց Երուսաղեմ, էլ չէկավ: Ես էլ գնացի ախպորս կնկա մոտ, միտքս փոխեցի, էն էլ հօելավ ընծի խաբեց, փախավ, ընտից հ'ետե էս հիվանդութուն ընծի ձեռ տվեց:

— Դե՛հ, դու էն կողմ կայնի, դու քու մեղքեր ասիր: Հիմի դռարի,— կանչում է քավորոշ մշկին,— դո՛ւ ինչ մեղք ունիս:

էն էլ չի պահում, ըսում է.— Իմ աղիս սանամերը էկավ իր քավորոշ տուն, ես միտքս փոխեցի, շատ շաքալամիշ էղա, իլլաճ չէղավ: Վերջ հօելա մե գիշեր աղիս տղեն մորթեցի, արնոտ դանակը գողտուկ դրի սանամոր շեպը, շառ քցի վրեն, էն էլ սուրբ մարդ էր՝ աղոթք էրեց, տղեն էլ սաղցավ, ընծի էլ անիծեց, ես էսենց էղա:

Սհակ վարդապետ աշում է, որ էն իր ախպերն է, էս էլ քավորոշ մշակն է:

Կանչում է կես մեռածին.— Արի աշեմ, դո՛ւ ինչ մեղք ունիս:

էն էլ ըսում է.— Ես մեր գեղացի քասիրի մեկից 200 մանեթ ձեռաց փող առա, բիրդան մեռա, իմ ախպրտիկ էդ մարդու փողը չըտվին: էդ մարդ էկավ գերեզմանից ընծի հանեց, էն կողմեն մեկ կնիկ էկավ, հանեց էդ մարդու փարեն տվեց, ընծի էլ թաղել տվեց: Սատանեն մտավ իմ մեջ, ես սաղցա, էկա հասա էդ կնկան, միտքս փոխվավ, էն կնիկ ընծի անիծեց, ես էսենց մնացի:

Կանչում է գամիճուն.— Դո՛ւ ինչ հիվանդ ես, ի՞նչ մեղք ունիս, ասա՛:

— Ես մի օր աշեցի մի շատ սիրուն, անլման օղլուշաղ էկավ նստավ գամին, հարցուցի հո՞ւր ես էրթում, ըսավ՝ էրթում եմ Երուսաղեմ: Ես օնչինչ շասի, մինակ իմ մտքի մեջ ըսի թե. «Հեյ վա՛խ,

էս սիրուն օղլուշաղը ի՞նչ դարդ ունի, որ էրթում է Երուսաղեմ, ընտից հետե խելքս էրթում ու գալում է:

Հմա վեղարը հանում է գլխից, մազերը թափում են հ'ուսերի վրա: Սհակ վարդապետը նոր ճանշնում է, որ իր կնիկն է:

— Իշտը, ես էն կնիկն եմ:

Տեգերը, քավորոջ մշկին ու էն մեռած մարդուն ըսում է.— Ձեր ազատումն էն է, որ գետին պատռի, դուք նե էրթաք ու ձեզի ծածկե:

Ասելու պես գետին պառռում է, երեքն էլ նե են էրթում:

Գամիճուն էլ ըսում է.— Դու էլ առողջացիր քու գործին գնա:

Գամիճին սաղնում, էրթում է իր գործին:

Ընտից հ'ետե ինքն ու Սհակ վարդապետը էլի ապրում են հ'իրար հետ, ինչունի մահը: Որ մեռնում են, տանում էրկսին մի տեղ թաղում են ու վրեն էլ մի պզտիկ վանք են շինում:

